

Dedikasi Buat Guru-Guruku Sepulau Kasih Kita



Dedikasi guru-guruku menelusuri waktu dan usia bermadah
sayang penuh iltizam

Pada azam membuka minda membuka kota ilmu khazanah lorong
ilmu anak-anak abad ke-21 yang sedang mencari diri pada
celah ranjau dan duri melentur susur peribadi terpuji.

Pada santun kata penuh hikmah

Kau guru-guruku sepulau sekasih ini tak mudah menoleh

Menghitung nostalgia sejarah

Jauh mata pandang dan mata hatimu yang telus menembus
tajam masa hadapan bagai utusan para wali melebar wawasan
jelas puncak kerjaya anak-anak dengan bekal fikir aras
tinggi

Menjulung inovasi kreativiti

Setulus budi pekerti

Siapakah yang mengerti?

Daya saing tersirat dari falsafah

Dan hasrat panduan jelas

Dari lokal ke antarabangsa
Terserlah jua rasa cinta abadi
Pada coretan selembat catatan.

Bersatulah guru-guruku sepulau sekasih ini dengan hasrat
dan niat suci sedingin embun pagi
Pada basah janji
Doamu saban pagi
Tercerna halus pada ucapan
Terima kasih cikgu
Kaulah guru-guruku
Yang memahami harga diri
Memimpin penuh integriti
Pada halus budimu
Pada cerah wajahmu
Terserlah kuntum senyuman
Menggunung harapan
Ke puncak menara
Guruku sayang
Namamu sentiasa meniti dari bibir ke bibir
Kerana kaulah guruku yang sentiasa bijak menterjemah
mimpi menjadi realiti.....

Kata pesan tegur nasihatmu
Jadi pedoman sepanjang hayat
Pada hari ulang tahun
Tarikh keramat 16 Mei
Tersepat kemas di hati.

Selamat Hari Guru.

Terima kasih cikgu!

“Guru Pembina Negara Bangsa”

SAMSA HARRIS

JDT: JALAN DURIAN TUNJUNG, LABUAN

10 MEI 2017



Encik Sahar bersama warga guru SMK Pantai, sempena sambutan Hari Guru 2017



Tema Hari Guru 2017 SMK Pantai : Kalau saya bukan seorang guru

Maitah KUPI-KUPI HAIE GU'U – Pendidikan Berkualiti memacu gelombang ke-2 PPPM 2016-2020



Labuan, 23 Mei – Jabatan Pendidikan Wilayah Persekutuan Labuan telah mengadakan Program “Maitah kupa-kupa Haie Gu’u” sempena sambutan Perayaan Hari Guru Peringkat WP labuan di Ruang Legar Ujana Kewangan Labuan.

Seramai 134 Orang guru dari 26 buah sekolah hadir dalam program ini. Program bual bicara santai yang bermula dari pukul 2.30 petang ni juga turut dihadiri oleh Pengarah Pendidikan WP labuan En Raisin Bin Saidin.

Antara ahli panel ialah, Guru Besar Sekolah Kebangsaan Pekan Satu WP labuan, En Jaafar Bin Matusin, Pegawai

SISC+, En Pg Abd Kadir Bin Pg Budin Guru Cemerlang dari SMK Labuan , En Nazrin Bin Ismail dan di pengerusikan oleh Pengetua SMK Ranche-Ranche, En Omar Baki Bin Matusin.

Tema program ini ialah "Pendidikan Berkualiti memacu Gelombang ke-2 PPPM 2016 2020. Antara perkara yang dibincangkan ialah Pendidikan Abad ke-21 (PAK21), Pentaksiran Berasaskan Sekolah (PBS) dan Kemahiran berfikir aras Tinggi (KBAT).



Sokongan penuh daripada Encik Raisin Saidin, ketua-ketua sektor, para pengetua dan guru besar serta guru-guru Labuan

Sebanyak 10 gerai yang mempamerkan pelbagai inovasi daripada guru-guru di WP Labuan. Antara inovasi yang menarik perhatian para pengunjung ialah Inovasi daripada bahan-bahan terbangun oleh Cikgu Hasnan dari SK Pekan Satu dan Inovasi 1 Spy 5 Stars oleh Cikgu Hyginus Lester dari SMK Mutiara WP Labuan.

Program yang diilhamkan oleh Pengarah Pendidikan WP labuan ini juga diserikan dengan persembahan nyanyian duo oleh En Irham dan En Marzuki dari Jabatan Pendidikan WP Labuan serta persembahan tiupan seruling dan sajak oleh En Sanin, tenaga pengajar dari Labuan International School WP Labuan.



Pameran inovasi oleh guru-guru Labuan

Semua peserta yang hadir meluahkan rasa gembira dan teruja kerana Sambutan Hari guru pada tahun ini menampakkan kelainan daripada sambutan pada tahun-tahun sebelumnya. Program berakhir pukul 4.30 petang dengan acara kuiz kepada semua peserta secara maya menggunakan program “Kahoot” yang dikendalikan oleh cik Suriani dari Sektor Pengurusan Akademik, Jabatan Pendidikan WP Labuan.



Sekalung tahniah dan syabas kepada urusetia Sektor Pengurusan Akademik, JPWPL

Berita Oleh : Saudara Inanis Fatinisupi bin Abdullah

Sambutan Hari Guru 2017 WP Labuan Berlangsung Penuh Ceria



Labuan – Sambutan Hari Guru Peringkat Wilayah Persekutuan Labuan Tahun 2017 telah berlangsung dengan penuh ceria dan warna-warni pada 20 Mei 2017 bertempat di Dewan Serbaguna Perbadanan Labuan.

Tema Sambutan Hari Guru tahun ini adalah **Guru Pembina Negara Bangsa**.

Majlis yang di sempurnakan oleh YB Ahli Parlimen P166 W.P. Labuan, Datuk Rozman bin Datuk Haji Isli ini dihadiri oleh Pengarah Pendidikan, En. Raisin bin Saidin, tetamu jemputan, Datuk Sri Alias bin Hj. Abdul Rahman, ketua-ketua sektor, para pengetua, guru besar, pegawai Jabatan Pendidikan WP Labuan, kumpulan Pesara Guru, YDP

PIBG dan yang diraikan para guru di Wilayah Persekutuan Labuan.

Turut hadir Ketua-Ketua Jabatan Kerajaan, Ketua-Ketua Kampung dan wakil-wakil agensi swasta dan warga pendidik yang terdiri daripada guru di semua sekolah Wilayah Persekutuan Labuan termasuk Kolej Vokasional Labuan, Kolej Matrikulasi Labuan, Sekolah Antarabangsa Labuan (LIS) dan tadika-tadika swasta.



Ikrar Hari Guru yang dipimpin oleh Encik Raisin Saidin bersama ketua-ketua sektor, para pengetua dan guru besar

Tn. Hj. Henarin bin Hj Adinda telah dipilih sebagai penerima Anugerah Tokoh Guru Peringkat WP Labuan Tahun 2017 di atas sumbangan bakti penuh dedikasi yang telah dicurahkan kepada dunia pendidikan samada di Labuan mahupun di negeri Sabah bermula awal tahun 70-an sehingga tahun 2003.

Beliau menerima RM2,000 dalam bentuk sijil premium daripada BSN dan RM1,000 daripada Bank Islam yang turut menyumbang RM200 kepada setiap Ikon Guru.

Majlis yang bermula pada jam 8.00 pagi ini turut memberi

penganugerahan kepada 52 orang penerima Anugerah Anak Guru Cemerlang, 15 orang guru bagi Anugerah Guru Inovatif (Johan : Nazrin bin Ismail), 3 orang guru Anugerah Ikon Guru (Ismail bin Abdullah, Suriani Alland Rice Oxley dan Samih bin Kukung), seorang penerima Anugerah Kepimpinan Teknologi Maklumat dan Komunikasi (Ismail bin Abdullah), seorang penerima Anugerah Prasekolah Gemilang (Samih bin Kukung), dan dua orang penerima Anugerah Guru Program Pendidikan Khas Integrasi (PPKI) Cemerlang (Roslaniah binti Zainal dan Vincent Kubing Anak Ajah).



Kiri – Encik Raisin Saidin bersama Tokoh Guru 2017 Tn Hj Henarin, kanan – Encik Ismail bersama Cikgu Nazrin penerima anugerah Ikon Guru, kepimpinanan TMK dan Guru Inovatif

Ucapan perasmian yang disempurnakan oleh Datuk Rozman bin Datuk Haji Isli, beliau berkata “guru jugalah yang menjadi sumber inspirasi anak watan bagi memacu aspirasi negara menjadikan Negara yang kita cintai maju dan sejahtera. Guru juga menjadi wadah penyemai perpaduan dan guru bertanggungjawab menanam sifat perpaduan dalam jiwa generasi muda kerana melentur buluh biarlah dari rebungunya”. Beliau juga turut mengucapkan jutaan terima

kasih kepada insan yang bergelar guru di mana jua mereka berada. Biarlah ungkapan keramat 'guru' atau 'cikgu' terus kekal meniti di bibir murid, ibu bapa dan masyarakat hingga ke akhir hayat seorang guru.



Keriang Hari Guru terpancar di wajah guru-guru SK Kerupang

Menurut Encik Raisin Saidin, pelbagai aktiviti dijalankan sempena Hari Guru peringkat Wilayah Persekutuan Labuan. Antaranya ialah sesi berkunjung ke rumah pesara guru, khidmat masyarakat, kempen derma darah, sukan dan rekreasi, program bacaan Yaasin, makan malam serta forum hari guru yang dikenali sebagai Kupi-kupi Hari Guru yang akan berlangsung pada 23hb Mei 2017.

Semua program yang telah dirancang bertujuan mengeratkan dan mendekatkan lagi hubungan di kalangan warga pendidikan sendiri mahupun dengan masyarakat umumnya.



Warga Pesara Guru dan PIBG yang turut hadir memeriahkan majlis

Pada majlis itu, Encik Raisin Saidin mewakili Jabatan Pendidikan Wilayah Persekutuan Labuan menerima sumbangan daripada YB Datuk Rozman sebanyak RM4,000 untuk menampung perbelanjaan majlis makan malam Hari Guru manakala RM3,000 daripada Datuk Sri Alias untuk menampung sambutan Hari Guru 2017.

Encik Raisin Saidin turut mengucapkan terima kasih atas sumbangan Bank Rakyat, PIBG, pengusaha kantin sekolah dan guru-guru.



Keceriaan warga guru SK Pantai – Penampilan Terbaik

Dalam majlis tersebut, YB Rozman juga berkesempatan melancarkan buku Antologi Cerpen yang bertajuk Catatan Seorang Guru yang telah diterbitkan oleh Persatuan Penulis Wilayah Persekutuan Labuan (PERWILA) dengan kerjasama Jabatan Pendidikan Wilayah Persekutuan Labuan.

Anugerah Khas Keselamatan Perlindungan Tahun 2016



Labuan, 12 Mei – Jabatan Pendidikan W.P Labuan telah menerima Anugerah Khas Keselamatan Perlindungan daripada Pejabat Ketua Pegawai Keselamatan Kerajaan Malaysia. Jabatan Pendidikan W.P Labuan telah diberikan “Anugerah Khas Keselamatan Perlindungan Tahun 2016” BAIK yang ditandatangani oleh CP Dato’ Zamri Bin Yahya, Ketua Pengarah Keselamatan Malaysia.



Encik Raisin Saidin Menerima Sijil Anugerah Khas daripada Encik Mathew

Anugerah ini telah disampaikan oleh Pengarah Pejabat Ketua Pegawai Keselamatan Kerajaan Malaysia W.P Labuan Encik Mathew Lee a/k Musa diringi En Mohd Nazri bin Sofian pada 12.05.2017 jam 9.00 pagi di Pejabat Pengarah Pendidikan JPWPL.



Sijil Anugerah Khas Keselamatan Perlindungan Tahun 2016

Badudun Kitani PIBK Labuan – Limbang



LABUAN- Sektor Pengurusan Sekolah, Jabatan Pendidikan WP Labuan telah menganjurkan Program “BADUDUN KITANI PIBK LABUAN-LIMBANG ” anjuran bersama Yang Dipertua PIBG dan PGB WP Labuan telah mengadakan lawatan ke Sekolah-sekolah PIBK Cemerlang di Limbang pada 27-29 April 2017. Seramai 24 orang ahli rombongan terdiri daripada pegawai JPNWPL, PGB, YDP dan AJK PIBG.

Rombongan yang diketuai oleh Puan Zaliha Mohd Salleh, Ketua Unit Perhubungan, Pendaftaran dan Pendidikan Swasta selaku pegawai meja PIBK JPNWPL bersama YDP PIBG dan PGB Wp Labuan telah disambut oleh Encik Mohamad Haji Tangah Pegawai Pendidikan Daerah Limbang.



Puan Maimoon menyampaikan cenderamata kepada Encik Mohamad

Lawatan ini bertujuan untuk memantapkan pengurusan PIBG serta mewujudkan pemuafakatan komuniti ke arah perubahan paradigma seluruh anggota masyarakat mengenai kepentingan keterlibatan semua pihak dalam kemenjadian murid-murid di WP Labuan melalui PIBK sekolah seterusnya dapat menjalin kerjasama dengan PGB dalam pengurusan PIBK di sekolah.

Program ini menjadi platform kepada PIBG di Labuan untuk berkongsi dengan sekolah cemerlang PIBK seperti SK Ulu Lubai dan SMK Medamit. Rombongan juga diberi penerangan oleh Encik Mohamad Haji Tengah Pegawai Pendidikan Daerah Limbang tentang pencapaian akademik sekolah-sekolah di Limbang.



Jalinan Kerjasama Guru Besar Labuan dengan Guru Besar SK Ulu Lubai

Encik Jaul Bunyau berkata sesuatu yang unik mengenai sekolah ini ialah sokongan dan kerjasama masyarakat setempat dalam semua aktiviti dirancang bagi melonjakkan kecemerlangan sekolah termasuk gotong-royong dan membantu sekolah menyediakan makanan pelajar. Semangat dan komitmen luar biasa guru besar, guru dan ibu bapa menjadi rahsia kejayaan Sekolah Kebangsaan (SK) Ulu Lubai, dipilih sekolah pedalaman pertama di negara ini yang diiktiraf sebagai Sekolah Berprestasi Tinggi (SBT). Kejayaan itu hasil usaha bersama guru dan ibu bapa yang komited dalam semua aktiviti pembelajaran, pengajaran dan kokurikulum murid di situ.

Lawatan ke Sekolah Menengah Kebangsaan Medamit, rombongan telah dibawa melawat ke kelas abad 21, Bilik Seni yang dilengkapi dengan pakaian tarian tradisional sarawak dan juga tarian melayu. Layanan mesra yang diberikan kepada

rombongan daripada Raja Manikam, Pengetua SMK Medamit dan guru-guru menampakan komitmen yg jitu pendidik kepada anak-anak didik di sekolah tersebut.



Para pelajar SMK Medamit

Turut hadir bersama Puan Maimoon Hj Matnoh, Ketua Sektor Pengurusan Sekolah, Pengetua guru besar serta YDP dan ahli PIBG.

Berita Oleh : Sektor Pengurusan Sekolah

400 Orang Calon SPM 2017 Sertai Program Sejarah



Jabatan Pendidikan Wilayah Persekutuan Labuan dengan kerjasama Management Science University (MSU) menganjurkan Ceramah dan Bengkel Teknik Menjawab serta Belajar Sejarah secara Aktif, Kreatif, Inovatif dan Efektif bertempat di Dewan SM Sains Labuan. Bengkel dikendalikan oleh Puan Hanita Ladjaharun, Guru Cemerlang Sejarah dari SMK Bandaraya Kota Kinabalu.

Menurut penyelaras program, Encik Mohd Nizam bin Yasim, bengkel kali ini melibatkan 15 guru dan 400 calon SPM 2017 daripada semua sekolah menengah di Labuan termasuk murid daripada Labuan International School(LIS), SMAIWP dan Kolej Vokasional.

Tujuan utama bengkel ini adalah untuk meningkatkan kemahiran menjawab Sejarah di peringkat SPM dalam kalangan calon-calon SPM tahun ini. Penganjur berharap agar program ini akan menjadi tiang kepada jambatan kejayaan murid dalam SPM 2017 terutamanya dalam mata pelajaran Sejarah.



Pada masa ini di peringkat sekolah menengah, ia adalah mata pelajaran yang wajib diambil oleh setiap pelajar dan wajib lulus,□□ sebagai syarat untuk mendapatkan sijil SPM. Langkah menjadikan mata pelajaran Sejarah sebagai syarat wajib lulus di peringkat SPM mulai tahun 2013 bukan untuk membebankan pelajar, sebaliknya bertujuan meningkatkan pengetahuan mereka mengenai sejarah Negara.

Berita Oleh : Sektor Pengurusan Akademik

**Maitah Badudun Kitani,
Mesra Kg Generasi Cemerlang
kali kedua**



22 April – Sektor Pengurusan Sekolah, Jabatan Pendidikan WP Labuan telah menganjurkan Program “Maitah Badudun Kitani, Mesra Kg Generasi Cemerlang” buat kali kedua bagi zon 2 di Kampung Layang-layangan selaku tuan rumah melibatkan ketua-ketua kampung Sg Labu, Bukit Kalam, Sg Bangat, Pulau Akar, Pengetua Dan Guru Besar Zon 5, YDP PIBG SK Layang-layangan, SK Bukit Kalam dan SMK Mutiara.

Program ini diadakan untuk memantapkan pemuafakatan komuniti ke arah perubahan paradigm seluruh anggota masyarakat mengenai kepentingan keterlibatan semua pihak dalam kemenjadian murid-murid di WP Labuan ini.

Antara pengisian program pada kali ini adalah pembentangan perkongsian amalan terbaik daripada anak jati kampung yang terlibat yang disampaikan oleh Cik Juraidah Hj Aman, Guru Cemerlang Matematik di SMK Taman perumahan Bedaun. Juraidah berkongsi bagaimana cara untuk menjadi mata pelajaran matematik tersebut supaya menjadi mata pelajaran yang digemari oleh para murid.

Perkongsian amalan terbaik juga disampaikan oleh En Sudin

Hj Samat dijadikan IKON anak jati Kampung Sungai Labu yang berjaya. Encik Saminan Hj Sabtu, Penolong Kanan Ting 6, SMK Labuan WP Labuan dan Cik Sajaratul Aqira Hamidon, Pengurus Amal Palestin Berhad, WP Labuan juga turut membentangkan peranan dan tanggungjawab jabatan masing-masing dalam membantu warga Palestin. Pameran Amal Palestin turut diadakan.



Encik Raisin Saidin
menyampaikan sijil
penghargaan

Encik Saminan juga membentangkan kebaikan dan kelebihan-kelebihan yang terdapat apabila murid-murid menyambung pelajaran ke tingkatan 6.

Selain itu program ini juga memberi penghargaan kepada individu yang banyak menyumbangkan tenaga, material, dan juga kepakaran untuk pemangkin kemenjadian murid-murid

melalui PIBK. Anugerah Khas PIBK ini telah diberikan kepada En Saminan Bin Hj Sabtu bagi zon 5 ini.

Encik Raisin Saidin, Pengarah Pendidikan Labuan dalam ucapannya, program ini dapat mengimbuai semula pengalaman dari seorang murid kepada orang yang berjaya melalui perkongsian amalan terbaik daripada anak-anak jati dari kg yang terlibat.

Di samping itu, murid-murid juga dapat satu pengalaman dalam aktiviti apabila menjawab soalan-soalan pengalaman dalam kertas peperiksaan bahasa melayu.

Beliau berharap supaya pihak sekolah khususnya PGB utk mengenalpasti anak-anak dari kampung yang terlibat memastikan anak-anak ini lulus dalam peperiksaan agar apabila anak-anak ini meninggalkan sekolah ada mempunyai sijil pendidikan.

Encik Raisin Saidin juga berharap agar warga Labuan mengambil peluang menikmati kemakmuran Negara ini untuk meningkatkan prestasi pendidikan anak masing-masing.

Puan Zaliha binti Mohd Salleh, selaku Pegawai Meja PIBK, JPNWPL memaklumkan program ini akan diteruskan lagi kepada Zon 3 pada bulan Mei nanti.

Ketua Kampung Layang-Layangan juga melahirkan rasa kesyukuran dengan adanya program ini. Beliau berkata program ini bukan saja dapat menyatukan Jabatan pendidikan dengan warga kampung, malahan program ini dapat melahirkan rasa kepunyaan warga kampung itu sendiri terhadap kemenjadian anak-anak mereka.



YB Rozman dalam ucapan perasmian

YB Datuk Rozman bin Hj Isli, Ahli Parlimen dalam ucapan perasmianya turut mengucapkan tahniah kepada Jabatan Pendidikan WP Labuan kerana berjaya meneruskan program Maitah Badudun MKGC untuk kali yang kedua.

Beliau juga turut mengucapkan tahniah kepada ketua kampung Layang-layangan dan ketua kampung yang terlibat sama menjayakan program ini. Beliau akan terus memastikan perkhidmatan yang terbaik untuk rakyat dapat disampaikan kepada penduduk kampung.

Beliau juga berharap agar program ini dapat diteruskan dan memberi peluang terbaik untuk berkongsi maklumat dalam bidang pendidikan bersama warga kampung.

Turut hadir, Puan Maimoon bin Hj Matnoh, Ketua Sektor Pengurusan Sekolah, wakil Amal Palestin, serta Pengetua/GBesar dan ibu bapa penerima anugerah

pencapaian akademik cemerlang.

Berita Oleh : Sektor Pengurusan Sekolah

120 Peserta ikuti Program Mendepani Cabaran Aqidah Umat



Seramai 120 peserta telah mengikuti Program Mendepani Cabaran Aqidah Umat Siri 2, anjuran Bahagian Pendidikan Islam, Kementerian Pendidikan Malaysia (KPM) dengan kerjasama Unit Pendidikan Islam, Sektor Pengurusan Akademik (SPA), Jabatan Pendidikan Wilayah Persekutuan Labuan.

Program ini dirancang untuk membicarakan persoalan aqidah umat islam, khususnya kepada warga pendidikan. Pengisiannya menjurus kepada pengukuhan aqidah yang sah iaitu yang menurut Ahli Sunnah Wal Jamaah. Program ini juga diharap dapat memberikan kefahaman yang mantap bagi menghadapi serangan-serangan aqidah hari ini seperti fahaman syiah, liberalisme & pluralisme agama, salafi wahabi, millah abraham dan ajaran hakikat makrifat.

Majlis yang diadakan di Mini Auditorium Anjung Budaya, Taman Damai, Layang-Layangan baru-baru ini telah disempurnakan perasmiannya oleh Timbalan Pengarah Pengurusan Dakwah dan Syiar Islam, KPM, Puan Hajjah Kamariah Isa. Turut hadir Dakwah Kepimpinan , Bahagian Pendidikan Islam, KPM Tuan Haji Arifuddin Abd Hamid dan Ketua Sektor Pengurusan Akademik, Puan Norismah Ab Moin. Hadir sama Pegawai Yayasan Murni Aqidah, Tengku Rozaidin Tengku Yazid dan Ketua Unit Pendidikan Islam, JPWPL, Ustaz Mohd Syahir Yusoff.

Program ini turut disokong oleh Yayasan Murni Aqidah, Pertubuhan Dakwah Islamiah Sekolah-Sekolah Malaysia (Pekdis) cawangan Labuan dan Pusat Pungutan Zakat (PPZ) Labuan.

Petikan Sumber Dari : New Sabah Times 26 April 2017

**Pengurusan Bilik Darjah
Berkesan : Guru**

Prihatin, Murid Cemerlang



18 April – Pengurusan Bilik Darjah Berkesan: Guru Prihatin, Murid Cemerlang, begitulah intipati penting amanat dari Pengarah Pendidikan Jabatan Pendidikan WP Labuan Encik Raisin Saidin dalam perhimpunan bulanan bagi bulan April 2017.

“Dalam menyemarakkan PdPc Abad ke-21 maka peranan Guru Prihatin menjadikan murid cemerlang ialah menjadi Pengurus Bilik Darjah. Guru Prihatin perlu bijak mengawal kelas, dapat menimbulkan suasana kemesraan antara guru dengan murid dan memastikan kelas berada dalam keadaan kondusif sebelum memulakan sesi pembelajaran dan pengajaran”, katanya dalam ucap tama majlis tersebut.

Majlis juga diserikan dengan pelancaran Pelan Strategik Jabatan Pendidikan Wilayah Persekutuan Labuan 2017-2018 dengan tajuk ‘Memacu TS 25’ telah disempurnakan oleh Encik Raisin bersama ketua-ketua sektor.

Pelan Strategik ini merupakan pelan jangka pendek yang

memfokuskan aspirasi dan kemenjadian murid.

Ini diikuti dengan penyampaian cenderamata dan sijil penghargaan kepada warga pendidikan yang telah bersara bagi menghargai pengorbanan, jasa dan sumbangan yang telah diberikan selama ini khususnya dalam dunia pendidikan.



Pesara guru, Puan Kamsiah menerima sijil dan cenderamata dari Encik Raisin Saidin

Penyampaian anugerah khas pengarah, penyerahan surat kenaikan pangkat, sijil '*staff of the month*' dan sambutan hari lahir merupakan agenda tetap majlis bagi meraikan dan menghargai warga pendidikan Labuan.

Majlis Perhimpunan Bulanan ini telah diadakan di Pusat Kokurikulum Negeri dan dihadiri oleh ketua-ketua Sektor, para pengetua dan guru besar, ketua-ketua unit, guru yang diraikan serta sebahagian warga Jabatan Pendidikan WP Labuan.

Pengiktirafan kepada Murid, Guru dan Sekolah Labuan



Labuan, 18 Apr – Jabatan Pendidikan Wilayah Persekutuan Labuan meraikan murid-murid dan para guru yang menempa kejayaan yang membanggakan dalam bidang Kokurikulum, Sukan dan Hal Ehwal Murid sepanjang tahun 2016 di Majlis Anugerah Gemilang kali ke-16 bertempat di Dewan CUN, SK Pekan Satu, Labuan hari ini.

Majlis Anugerah Gemilang kali ke-16 diadakan bagi memberi pengiktirafan kepada murid, guru dan sekolah yang mencapai tahap prestasi terbaik dalam bidang Hal Ehwal Murid, Kokurikulum dan Sukan. Sesungguhnya anugerah ini dapat menjadi penyuntik semangat dan motivasi murid, guru dan sekolah untuk mencapai prestasi terbaik dalam bidang yang diceburi.

Majlis telah disempurnakan oleh Encik Raisin Saidin, Pengarah Pendidikan Wilayah Persekutuan Labuan. Beliau

menzahirkan rasa bangga dan mengucapkan tahniah kepada semua murid, guru dan sekolah yang telah berusaha bersungguh-sungguh bagi mengharumkan nama Labuan di peringkat kebangsaan mahupun antarabangsa.

“Kepada Agensi Kerajaan dan Agensi Bukan Kerajaan, saya merakamkan penghargaan dan ucapan terima kasih di atas komitmen dan kerjasama dalam program-program yang dianjurkan oleh jabatan ini. Dengan pemuafakatan dan gandingan bahu ibu bapa, anggota masyarakat, rakan media, sektor swasta, agensi kerajaan dan bukan kerajaan ini, kita telah menjana kecemerlangan pada tahun lepas”, katanya.



Encik Raisin Saidin bersama murid dan guru SM Sains Labuan



Kenangan murid dan guru SMK Ranca-Ranca

Sebanyak 20 kategori telah disampaikan termasuk anugerah Jasamu Dikenang iaitu suatu anugerah kepada warga pendidikan yang banyak memberi sumbangan bakti dalam bidang Hal Ehwal Murid, Kokurikulum dan Sukan. Anugerah ini telah diberikan kepada Encik Sulaiman Madin, mantan Guru Besar SK Tanjung Aru dan Tuan Haji Selamat Daliman, mantan Ketua Sektor Pengurusan Pembangunan Kemanusiaan, JPWPL.



Encik Raisin Saidin menyampaikan anugerah Jasamu Dikenang kepada Encik Sulaiman dan Tn Haji Selamat

Hadir sama dalam majlis tersebut, Encik Hasbollah Amit, Ketua Sektor Pengurusan Pembangunan Kemanusiaan, Encik Omar Baki Matusin, Yang Dipertua Majlis Pengetua Sekolah Malaysia, Labuan, En Jaafar Matusin, Guru Besar SK Pekan Satu dan Puan Dg Sarifah Mahmood Naib YDP Majlis Guru Besar Labuan.